

Na osnovu Člana 33. Statuta Košarkaškog Saveza Bosne i Hercegovine, Upravno Odbor Košarkaškog Saveza Bosne i Hercegovine na svojoj sjednici održanoj 26.01.2010. godine usvojio je:

## **PRAVILNIK**

### **O OSNOVAMA SISTEMA KOŠARKAŠKIH TAKMIČENJA U BIH**

#### **1. OPŠTE ODREDBE**

**1.1.** Pravilnikom se propisuju jedinstvene odredbe o organizaciji, rukovođenju i realizaciji najkvalitetnijih takmičenja Prvenstva i KUP Bosne i Hercegovine u svim uzrasnim kategorijama.

**1.1.1.** Pod pojmom "najkvalitetnija takmičenja" podrazumijevaju se:

- Prvanstvo i KUP BiH u muškoj seniorskoj kategoriji,
- Prvanstvo i KUP BiH u ženskoj seniorskoj kategoriji,
- Prvenstvo BiH za pionire, kadete i juniore u muškoj i ženskoj kategoriji.

**1.2.** Organizovanje najkvalitetnijih takmičenja u BiH je u isključivoj nadležnosti Košarkaškog Saveza Bosne i Hercegovine (u daljem tekstu: Savez), njegovih organa i tijela.

**1.3.** Osnovna košarkaška takmičenja u Bosni i Hercegovini su u nadležnosti članova Saveza, Košarkaškog saveza Republike Srpske i Košarkaških saveza Federacije BiH (u daljem tekstu: Članovi Saveza).

**1.4.** U realizaciji svih vrsta i kategorija takmičenja iz nadležnosti KS BiH dosljedno i bez izuzetka primjenjuju se slijedeći principi:

- Učešće u takmičenju je dobrovoljno,
- Pravo se stiče po osnovu plasmana u takmičenju Bosne i Hercegovine u predhodnoj sezoni i plasmana u odgovarajućem

rangu takmičenja Članova Saveza, a u izuzetnim slučajevima po pozivu,

- Učesnici takmičenja eventualne sporove rješavaju u okviru normativnih akata Saveza ili Članova Saveza i preko njihovih nadležnih organa i tijela,
- Učesnici u takmičenju se pridržavaju FIBA Evropa generalnih pravila, propozicija za pojedine vrste takmičenja i blagovremeno izvršavaju sve obaveze (prijave, uplate utvrdjenih finansijskih obaveza, obrada takmičarske dokumentacije i sl.) propisane za takmičenje u kojem učestvuju.

**1.5.** Sve službene utakmice igraju se po Službenim pravilima košarkaške igre Međunarodne košarkaške federacije (FIBA), usvojenim i objavljenim od Košarkaškog Saveza BiH, po ovom pravilniku i po propozicijama odgovarajućeg takmičenja.

Revijalne, turnirske i prijateljske utakmice mogu se igrati po pravilima drugih košarkaških asocijacija (NBA i sl.).

**1.6.** Za službena košarkaška takmičenja za svakog igrača i igračicu (u daljem tekstu: igrač) utvrđuje se opća zdravstvena sposobnost, a za igrača ispod šesnaest (16) godina i igrača iznad četrdesetpet (45) godina života utvrđuje se posebna zdravstvena sposobnost u skladu s odredbama odgovarajućih propozicija takmičenja.

Način zdravstvene zaštite i kakvu zdravstvenu sposobnost trebaju imati sudije i treneri koji sudjeluju u košarkaškim takmičenjima propisuju i način njihovog provođenja definišu njihove matične organizacije.

**1.7.** Zabranjena je upotreba nedopuštenih sredstava (doping) prema pravilima Svjetske antidoping agencije, Olimpijskog Komiteta BiH (Agencija za borbu protiv dopinga u sportu).

Propozicijama određenog takmičenja sankcioniše se upotreba nedopuštenih sredstava.

## **2. SISTEM TAKMIČENJA**

- 2.1.** Sistem takmičenja, broj učesnika i način organizovanja svih takmičenja iz Člana 1.1.1. utvrđuje Upravni Odbor Saveza na osnovu mišljenja Sručnog savjeta.
- 2.1.1.** Vrste takmičenja, broj učesnika i način njihovog sprovođenja, Članovi Saveza, uređuju svojim normativnim aktima na bazi razvijenosti košarkaškog sporta, a polazeći od opštih, materijalnih i drugih uslova svojih sredina i poštojući principe harmonizacije tih takmičenja sa takmičenjima iz nadležnosti Saveza, Regionalnih višedržavnih takmičenja i takmičenja FIBA Evrope.
- 2.1.2.** Odluka o sistemu takmičenja mora biti donijeta najmanje godinu dana prije početka sezone u kojoj će se primjenjivati.
- 2.2.** Takmičenja za Prvenstvo BiH igraju se dvostrukim bod sistemom ili turnirski.
- 2.2.1.** U pojedinim takmičenjima može se uvesti završno takmičenje – Doigravanje (play – off, play - out)
- 2.3.** Seniorska prvenstva organizuju se takmičenjem kroz ligu, dvostrukim bod sistemom (jedna utakmica kod kuće, jedna u gostima)
- 2.4.** Pionirska, kadetska i juniorska prvenstva u muškoj i ženskoj kategoriji organizuje se sistemom tri polufinalna turnira i finalnim turnirom, za svaki uzrast.
- U pojedinoj kategoriji, u zavisnosti od broja zainteresovanih klubova, može se organizovati takmičenje kroz ligu, dvostrukim bod sistemom (jedna utakmica kod kuće, jedna u gostima), te uvesti završno takmičenje – Doigravanje (Play – off, play - out).
- 2.4.1.** Učesnici polufinalnih turnira su najbolje plasirani timovi iz takmičenja prvenstva Članova Saveza.
- 2.4.2.** Učesnici finalnih turnira su pobjednici polufinalnih turnira (tri ekipe) i

drugoplasirana ekipe sa najboljim rezultatima iz polufinala (jedna ekipa).

- 2.4.3.** Turnirsko takmičenje igra se po jednostrukom bod sistemu.
- 2.5.** Takmičenja za KUP BiH, igra se sistemom eliminacija.
  - 2.5.1.** Završni finalni turnir organizuje se uz učešće četiri najkvalitetnija tima.
  - 2.5.2.** Broj ekipa koje učestvuje u KUP – u BiH, utvrđuje Upravno Odbor Saveza posebnom odlukom.
  - 2.5.3.** Odluka o broju ekipa koje učestvuju u KUP-u BiH, mora biti donijeta najmanje godinu dana prije početka sezone u kojoj će se primjenjivati.
- 2.6.** Ukoliko se pojedini dijelovi prvenstvenih ili KUP takmičenja igraju na rezultat iz dvije utakmice (domaćin-gost), obje utakmice računaju se kao jedna utakmica

Ukoliko je rezultat prve utakmice neriješen, računa se postignuti rezultat i neće se igrati produžetak. Ako je na kraju druge utakmice nakon zbrajanja koševa postignutih na obje utakmice rezultat neriješen, igra se produžetak kako je predviđeno Službenim pravilima košarkaške igre da bi se odredio pobjednik susreta.
- 2.7.** Precizniji opis takmičenja u svim kategorijama utvrđuje se odgovarajućim propozicijama.
  - 2.7.1.** Za pojedino prvenstveno takmičenje za svaku takmičarsku sezonu nadležno tijelo donosi odgovarajuće propozicije takmičenja kojima se uređuju prava, obaveze i odgovornosti učesnika takmičenja, međusobni odnosi učesnika takmičenja, prava i dužnosti službenih osoba na utakmici, tehnički normativi, licence, prekršaji i kazne, žalbe te finansijske obaveze učesnika takmičenja.
- 2.8.** O sudjelovanju BiH klubova u višedržavnim regionalnim takmičenjima, kao i o sudjelovanju u takmičenjima koje organizira i vodi FIBA/ULEB, odluku donosi Upravni odbor Košarkaškog Saveza BiH.



Regionalno višedržavno takmičenje sa učešćem muških i(ili) ženskih klubova iz BiH, dio su Sistema Takmičenja KS BiH, a Propozicijama takmičenja određuje se da li se klubovi iz tih takmičenja uključuju u Prvenstvo BiH u drugoj fazi takmičenja (Liga za prvaka) ili sudjeluju od samog početka Državnog prvenstva.

- 2.9.** Takmičenja iz Člana 1.1.1. realizuju se ranije utvrđenim Kalendarom takmičenja.
- 2.9.1.** Kalendar takmičenja koji predlaže tijelo ili Komesar takmičenja koji rukovodi takmičenjem, usvaja Upravni odbor Saveza i može se mijenjati samo kad to zahtijevaju posebni i opravdani razlozi.
- 2.9.2.** U slučaju da se preklapaju termini takmičenja i bilo koje reprezentativne obaveze, prednost imaju obaveze reprezentacija.

### **3. NAČIN BODOVANJA I ODREĐIVANJE PLASMANA**

- 3.1.** Plasman timova određuje se prema broju bodova osvojenih toku takmičenja, pri čemu se za svaku pobjedu dodjeljuje timu dva boda, za poraz jedan bod i nula bodova za predatu utakmicu.
  - 3.1.1.** Kod određivanja poredka timova primjenjuju se odredbe Pravila košarkaške igre.
- 3.2.** Zavisno od rezultata u takmičenju timovi prelaze iz nižeg u viši rang takmičenja i obratno.
  - 3.2.1.** Utvrđeni broj najslabije plasiranih ekipa se vraćaju u odgovarajući rang takmičenja Članova Saveza, njihova mjesta popunjavaju prvoplasirane ekipe iz najvišeg ranga tih takmičenja.
  - 3.2.2.** Izuzeci od ovog principa su mogući samo u posebnim okolnostima i kad je to u interesu košarkaškog sporta o čemu posebnom odlukom odlučuje Upravni odbor Saveza.
- 3.2.** Pobjednici takmičenja u pojedinim kategorijama stiču naslov “prvaka”, odnosno “pobjednika” KUP-a BiH.
  - 3.2.1.** Shodno ostvarenom plasmanu, timovi i članovi tima dobivaju nagrade

i priznanja, a u skladu sa Pravilnikom o nagradama i priznanjima KS BiH.

#### **4. UČEŠĆE TIMOVA U MEĐUNARODNIM TAKMIČENJIMA**

**4.1.** Timovi, na osnovu učešća i plasmana kroz takmičenja u BiH, učešća i plasmana u međunarodnim takmičenjima u predhodnoj takmičarskoj godini, ostvaruju pravo učešće u Međunarodnim takmičenjima na koja KS BiH ima pravo, za narednu godinu.

**4.1.1.** U takmičenja u BiH spadaju:

- Prvenstvo BiH,
- KUP BiH

**4.1.2.** U Međunarodna takmičenja spadaju:

- Takmičenja u organizaciji FIBA Europe,
- Višedržavna regionalna takmičenja priznata od strane KS BiH.

**4.2.** Na osnovu učešća i plasmana, u takmičenjima iz Člana 4.1.1. i 4.1.2., timovi dobivaju bodove čiji zbir daje ukupni plasman timova BiH koji određuje učesnike međunarodnih takmičenja.

**4.3.** Broj osvojenih bodova, za plasman u pojedinom takmičenju, određuje se na slijedeći način:

**4.3.1.** Muške ekipe:

- |   |          |
|---|----------|
| ▪ Pobjednik Prvenstva BiH (Prvak play off-a)      | 5 bodova |
| ▪ Drugoplasirani Prvenstva BiH (Drugi play off-a) | 2 boda   |
| ▪ Prvoplasirani u ligi do doigravanja (liga 14)   | 2 boda   |
| ▪ Učesnik Play Off-a                              | 1 boda   |
| ▪ Pobjednik KUPa BiH                              | 3 boda   |
| ▪ Učesnik Prvenstva BiH                           | 1 bod    |
| ▪ Učesnik u EURO Ligi                             | 4 boda   |

- Učesnik u regionalnoj NLB Ligi 2 boda
- Učesnik u EURO kupu 2 boda
- Učesnik u FIBA takmičenju 2 boda

**4.3.2. Ženske ekipe:**

- Pobjednik Prvenstva BiH (Prvak play off-a) 4 boda
- Drugoplasirani Prvenstva BiH (Drugi play off-a) 1 boda
- Prvoplasirani u ligi do doigravanja (liga 12) 2 boda
- Učesnik Play Off-a 1 boda
- Pobjednik KUPa BiH 2 boda
- Učesnik Prvenstva BiH 1 bod
- Učesnik u EURO Ligi 4 boda
- Učesnik u regionalnoj WABA Ligi 2 boda
- Učesnik u FIBA takmičenju 2 boda

**4.4.** Broj bodova dobiven kroz pojedine faze jednog takmičenja, zbraja se.

**4.5.** Ukoliko timovi, na osnovu učešća i plasmana kroz takmičenja iz Člana 4.1.1 ili 4.1.2. ostvare pravo učešća u jednom ili više takmičenja, svojom voljom odlučuju da li će učestvovati i u kojem od takmičenja će učestvovati.

**4.6.** Ukoliko je više timova, osvojilo isti broj ukupno osvojenih bodova, bolje plasirani je tim koji je ostvario bolji plasman u Prvenstvu BiH.

## **5. ORGANIZACIJA UTAKMICE**

- 5.1.** Organizator utakmice je klub koji igra na svom terenu ili klub koji treba da igra na svom terenu, a odredi neki drugi teren registrovan za taj nivo takmičenja.
- 5.2.** Organizator je odgovoran za sprovođenje organizacije utakmice u skladu sa odredaba Pravilnika o takmičenju i Propozicija, koje vrijede za to takmičenje.
- 5.3.** Dužnosti domaćina utakmice utvrđuje se propozicijama takmičenja.

## **6. PRAVO NASTUPA**

- 6.1.** U zvaničnim takmičenjima mogu učestvovati samo uredno registrovani klubovi i igrači.
- 6.2.** Za pojedina takmičenja izdaju se posebni takmičarski dokumenti – Licence, za sticanje prava nastupa.
  - 6.2.1.** Odlukom Upravnog odbora Saveza i Propozicijama takmičenja, propisuju se uslovi za izdavanje Licenci igrača, trenera, službenih osoba.
  - 6.2.2.** Igrači, treneri, ljekari i drugi zdravstveni radnici, kao i službeni predstavnici klubova smatrat će se dijelom tima, odnosno ekipe za nastup na utakmici samo ako raspolažu odgovarajućom licencom izdanom od nadležnog organa koji vodi takmičenje ili izdanom od Košarkaškog Saveza BiH.
  - 6.2.3.** Ovjeru takmičarskih dokumenata, za takmičenja iz nadležnosti Saveza, vrši Kancelarija Saveza.



## **7. PREKRŠAJI I KAZNE**

- 7.1.** Za prekršaje načinjene u toku takmičenja, prekršiocu se izriču odgovarajuće kazne.
- 7.2.** Preciznije odredbe i vrsta kazne za pojedine prekršaje definiše se Propozicijama takmičenja.
- 7.3.** Za prekršaje koje počine igrači, treneri, sudije, komesari (delegati) i druge službene osobe na utakmici ili u vezi utakmice, kao i za prekršaje za koje su odgovorni klubovi, kazne izriče takmičarsko tijelo (Komesar takmičenja), bez obzira radi li se o povredama odredaba ovog pravilnika, Disciplinskog Pravilnika KS BiH ili propozicija određenog takmičenja.
- 7.4.** Klub koji iz neopravdanih razloga ne nastupi na utakmici kao i klub koji skrivi prekid utakmice zbog incidenta na samom igralištu gubi utakmicu rezultatom 20:0 i ne dobiva bod za tu utakmicu.

Ukoliko prekid utakmice nastane usred nereda ili opasnog djelovanja gledalaca, klub domaćin gubi utakmicu rezultatom 20:0 i ne dobiva bod za tu utakmicu, osim kada je nepobitno utvrđeno da je do prekida utakmice došlo krivnjom gostujuće momčadi, koja u tom slučaju gubi utakmicu s rezultatom 20:0 i ne dobiva bod za tu prekinutu utakmicu.

- 7.5.** Klub čija ekipa samovoljno napusti igralište prije završetka utakmice i na poziv prvog sudije se ne vrati na igralište, isključuje se iz takmičenja i u sljedećoj takmičarskoj sezoni prebacuje u niži stepen takmičenja od onog u koji bi došla ispadanjem iz takmičenja u kojem je nastupala, a takmičenje u tom nižem stepenu otpočinje u sljedećoj takmičarskoj sezoni.
- 7.6.** Klub koji u jednoj takmičarskoj sezoni izgubi dvije utakmice rezultatom 20:0, prebacuje se u niži stepen takmičenja od onog u koji bi došao ispadanjem iz takmičenja u kojem je nastupao, a takmičenje u tom nižem stepenu otpočinje u sljedećoj takmičarskoj sezoni.

Ako je klub koji se prebacuje u niži stepen takmičenja odigrao polovicu ili više od polovice utakmica u takmičenju iz kojeg se isključuje, te odigrane utakmice registruju se postignutim rezultatima,

dok se preostale utakmice do kraja takmičenja registruju rezultatom 20:0.

Ako je klub koji je isključen iz takmičenja odigrao manje od polovice utakmica svi se rezultati poništavaju, a utakmice se registruju s rezultatom 20:0.

- 7.7.** Klub za kojeg se nedvojbeno utvrdi da je sudjelovao u lažiranju utakmice isključit će se iz takmičenja koje je u toku i prebaciti u niži stepen takmičenja u kojeg će se uključiti u sljedećoj takmičarskoj sezoni.

U pogledu broja odigranih utakmica prije isključenja primjenit će se odredbe člana 7.6. stav 2. i 3. ovog pravilnika.

- 7.8.** Klub koji je isključen iz takmičenja dužan je podmiriti troškove takmičenja za cijelo takmičenje kao da je u njemu ostao do kraja.
- 7.9.** Za prekršaje koji nisu obuhvaćeni propozicijama takmičenja, primjenjuju se odredbe Pravilnika o disciplinskoj odgovornosti i zaštiti takmičenja KS BiH.

## **8. RUKOVOĐENJE TAKMIČENJEM – POSTUPAK PO ŽALBI**

- 8.1.** Takmičenjima iz nadležnosti KS BiH rukovodi takmičarsko tijelo ili Komesar takmičenja, izabran od strane Upravnog odbora Saveza.
- 8.2.** Komesar takmičenja je osoba imenovana od strane Upravnog odbora Saveza za vođenje jednog ili više službenih takmičenja.
- Odukom o imenovanju utvrđuje se radnopravni status Komesara takmičenja, plaća odnosno naknada za obavljanje komesarskog posla, te vrijeme na koje se Komesar takmičenja imenuje.
- 8.3.** Tijelo ili Komesar, rukovodi takmičenjem na osnovu Propozicija takmičenja koje obavezno sadrže sve elemente neophodne za normalno i regularno odvijanje takmičenje.
- 8.4.** Tijelo ili Komesar registruje utakmice na osnovu odredaba Propozicija takmičenja, izuzev utakmica na koje je uložena žalba, u skladu sa Propozicijama i Pravilima igre.



**8.4.1.** Žalba na utakmicu se najavljuje potpisom kapitena tima u zapisnik utakmice.

Obrazloženje žalbe podnosi se Komesaru takmičenja ili tijelu koji provodi takmičenje.

**8.5.** Tijelo ili Komesar koji rukovodi takmičenjem uloženu žalbu može usvojiti ili odbiti.

Kada žalbu odbije, utakmica se registuje postignutim rezultatom. Kada žalbu usvoji, utakmica se poništava i određuje odigravanje nove ili registrovanje utakmice 20:0 u korist onoga ko je podnio žalbu.

Ne može se odbiti registracija utakmice na koju nije podnijeta žalba.

**8.5.1.** Jednom registrovana utakmica ne može biti poništena od Komesara takmičenja ili tijela koji provodi takmičenja.

**8.6.** Na Odluku tijela ili Komesara takmičenja ili na Odluku po žalbi, dozvoljena je žalba nadležnom drugostepenom organu Saveza.

**8.7.** Radnje po žalbenom postipku utvrđuju se u skladu sa Propozicijama takmičenja i važećim aktima Saveza.

## **9. SLUŽBENA LICA**

**9.1.** Službena lica na utakmicama su: komesari-delegati, sudije i pomoćne sudije.

**9.1.1.** Komesar (delegat) je osoba koja kontroliše primjenu Službenih pravila košarkaške igre, propozicija takmičenja kao i regularnost na utakmici.

Komesar (delegat) na utakmici obavlja i dužnost kontrolora suđenja, osim kad se u određenoj fazi takmičenja određuje poseban kontrolor suđenja.

Na službenoj utakmici komesar (delegat) predstavlja tijelo ili Komesara takmičenja

Za pojedine utakmice, u svrhu kontrole suđenja i organizacije utakmice određuju se Kontrolori suđenja i Supervizori.

**9.2.** Listu službenih lica za pojedina takmičenja utvrđuje Upravno odbor Saveza, na osnovu mišljenja Članova Saveza i predhodnih provjera, a

na osnovu prijedloga odgovarajućih tijela Saveza.

- 9.2.1.** Pomoćne sudije na prvenstvenim i kup utakmicama određuje nadležno sudijsko tijelo u mjestima odigravanja utakmica.
- 9.3.** Ovlaštenja Službenih lica na utakmicama, regulisana su Službenim pravilima igre i Propozicijama takmičenja.
- 10. PRELAZNE I ZAVRŠNE ODREDBE**
- 10.1.** Sva ostala pitanja takmičenja, koja nisu obuhvaćena ovim Pravilnikom, regulisati će se Propozicijama takmičenja za pojedina takmičenja.
- 10.2.** Za sva takmičenja u nadležnosti KS BiH, Upravno odbor Saveza ostvaruje uvid u pripreme i tok takmičenja, analizira ga po potrebi ili u slučaju posebnih okolnosti na koje ga upozore učesnici, odnosno nadležni organi, preduzima adekvatne mjere i donosi konačne odluke.
- 10.3.** Tumačenje odredaba ovog Pravilnika daje Upravno Odbor KS BiH.
- 10.4.** Ovaj Pravilnik stupa na snagu danom usvajanja, a primjenjuje se od dana objavljivanja u službenim glasilima KS BiH.
- 10.5.** Usvajanjem ovog Pravilnika prestaje da važi Pravilnik o takmičenju KS BiH, usvojen 15. Oktobra 2002. godine.

Sarajevo, 26.01.2010. godine,

Predsjednik KS BiH

Nihad Imamović

